



尋一個莊下

面對全球自然環境个污染摻破壞，面對世界人情關係个疏離同冷漠，你會尋哪位來定貼自家个生活？係佢，佢就想尋一個莊下，一個有夢想个莊下，來安身立命，好好過日仔。

夢想裡肚个莊下，屋脣有隔壁鄰舍，屋前有一頭牛眼樹，還有一條清清个圳水流過。屋背有一坵地好做菜園，還有一搭地好畜雞鴨，脣項種有綠竹同麻竹。四圍有靚靚个田坵做伴，較遠个地方，有一條淨俐个河壩，河壩對面有一重一重青溜溜仔个山仔。

平常時節，隔壁鄰舍相見面，會互相問安、打招呼，係種有麼个菜、買有麼个東西，會互相分享；閒時閒節，在屋脣个大樹下，隔壁鄰舍會共下打嘴鼓，有成時會共下打鬥敘；在緊工時節會互相揸手，係講今晡日吾屋下蒔田，隔壁鄰舍就會準備好人工、機器行前來幫忙，係講天光日隔壁鄰舍屋下割禾，佢兜乜會同農機摻人工準備好勢。係有麼个好事歪事，隔壁鄰舍也會行前來，揸這揸該，一直到事情處理好勢、圓滿。

屋前个圳溝，兩片析係用一隻一隻石頭結起來个砌，石頭摻石頭之間有縫，圳溝肚有沉底个泥沙仔，淨淨俐俐个圳溝水流過。在這位，蝦公毛蟹有空好囤，蜆仔湖鰱仔有泥好鑽，還有當多个魚仔，像鯽魚仔、白哥仔、塘虱這兜，在該位汨上汨下。屋前个圳溝，無農藥敌過，無厠糟水污染，係魚仔蝦公个快樂天堂，也係大人細子搞水洗身仔、摸螺挖蟹个好地方。

佢會畛等時節，在屋背个菜園種出當季个菜。春天，花菜、韭菜、角菜滿菜園；熱天，苦瓜、菜瓜、番瓜滿瓠棚；秋天，芋仔、芥藍、木瓜好收成；寒天，荷蘭豆、芥菜、蘿蔔好過年！一年透天，畛等時節種菜，淋水、擲草、委(ve)肥，畛等時節收成，日日煮最嫩个菜、逐餐食盡萐个菜。恁多年來，佢畛等時節種出當季个菜，實在毋係麼个難事哦！

屋背該搭空地畜頭牲，該位有青草好啄、有菜蓋(hab`)好食、還有飯糝攪薯糠，鴨仔一枋一枋畜，雞仔乜一枋畜過一枋。田坵蒔過，禾苗擲想，逐等鴨仔落到田項去，食蟲食草，毋使洩藥仔、淨愛入肥料，鴨仔一日一日大，禾仔乜一日一日靚。愛食雞鴨自家有，食飯食糜自家煮，毋使愁無米煮，乜毋使愁無肉氣。

尋一個恁樣个莊下，有青山綠水、隔壁鄰舍做伴仔，有草花樹木、蟲魚鳥獸好欣賞，做得自主生活，做得安樂過日仔。這方所在，愛到哪位去尋，你毋知？

作者：邱一帆

☆詞彙學習☆

【閒時閒節】han` sii` han` jied`：平常時候。

【肉氣】ngiug` hi：肉類。

【好事歪事】ho` sii` vai` sii：喜事喪事。

【薯糠】lung` hong`：糙米碾出的皮層。

【厠糟水】o` zo` sui`：骯髒的水。

【擲想】bang` xiong`：長高。